

दिनांक 27.09.2025

समय: 18.45 बजे

आकाशवाणी जयपुर-अजमेर
प्रादेशिक समाचार

- प्रधानमंत्री नरेन्द्र मोदी कह्यो— भारत आवता बगत मांय दूरसंचार प्रौद्योगिकी रो वैश्विक केन्द्र बणेला।
- मुख्यमंत्री भजन लाल शर्मा कह्यो—राजस्थान मांय बीएसएनएल रा 5 हजार 655 फोर जी टावर लगायी ज्या।
- प्रधानमंत्री काल संवारे 11 बज्यां आकाशवाणी ऊँ प्रसारित कर्या जावण वाळा खास कार्यक्रम **मन की बात** मांय विचार बतावेला।
- विश्व पर्यटन दिवस रे मौके आज प्रदेश मांय ई न्यारा-न्यारा कार्यक्रम राख्यी ज्या।

000

प्रधानमंत्री नरेन्द्र मोदी आज ओडिशा रा झारसुगुड़ा मांय भारत संचार निगम लिमिटेड— बीएसएनएल कानी ऊँ लगायी ज्या साढ़े 97 हजार ऊँ बत्ता नुवा 4जी मोबाइल टावरां रो उद्घाटन कीनो। आं मांय नुवी 4जी तकनीक वाळा 92 हजार छह सौ टावर ई शामिल है। करीब 37 हजार करोड़ रुपया रा खर्च ऊँ लगायी ज्या अ टावर पूरी तरह देशी तकनीक काम लेवे है। श्री मोदी कह्यो के भारत 2जी, 3जी अर 4जी तकनीकां रा विकास मांय पिछड़ ग्यो हो अर विदेशी तकनीक माथे निर्भर हो। वे कह्यो के आ उपलब्धि हासिल कर र भारत वा चंद देशां मांय शामिल व्हे ग्यो है जो खुद रा दूरसंचार नेटवर्क बणावण रो बूतो राखे है। प्रधानमंत्री कह्यो के भारत आवता बगत मांय दूरसंचार प्रौद्योगिकी रो वैश्विक केंद्र बणेला। श्री मोदी कह्यो के ई पहल ऊँ 30 हजार गांव बेगा ही हाई-स्पीड इंटरनेट ऊँ जुड़ेला जिण ऊँ पूरा देश मांय डिजिटल समावेशन ने बधावो मिलेला।

.....

प्रधानमंत्री रा ई कार्यक्रम ऊँ मुख्यमंत्री भजनलाल शर्मा ई वर्चुअल तरीका ऊँ जुड़्य। ई मौके वे कह्यो के बीएसएनएल रा देशी 4जी नेटवर्क री सरुआत नवाचार अर खुद रे पाण ऊबा भारत रा बधता कदम बतावे है। मुख्यमंत्री कह्यो राजस्थान मांय ई 5 हजार 655 टावर लगायी ज्या है।

.....

000

आकाशवाणी ऊँ हर महीना प्रसारित कर्यो जावण वाळो खास कार्यक्रम **मन की बात** काल प्रसारित कर्यो जावेला। प्रधानमंत्री नरेन्द्र मोदी रा ई कार्यक्रम री आ 126वीं कड़ी व्हेला। ओ कार्यक्रम संवारे 11 बज्यां ऊँ आकाशवाणी अर दूरदर्शन रा पूरा नेटवर्क माथे प्रसारित कर्यो जावेला। ई सागे ई आकाशवाणी समाचार री वेबसाइट, न्यूज ऑन एआईआर मोबाइल एप, आकाशवाणी समाचार, दूरदर्शन समाचार, प्रधानमंत्री रा दफ़तर अर सूचना अर प्रसारण मंत्रालय रा यू-ट्यूब चैनलां माथे ई ओ कार्यक्रम प्रसारित कर्यो जावेला।

000

राज्यपाल हरिभाऊ बागडे आज सिरोही जिला रा आबूरोड़ मांय ब्रह्माकुमारीज संस्थान री ओर ऊँ राख्यी ज्या राष्ट्रीय मीडिया महासम्मेलन रो उद्घाटन कीनो। ई सम्मेलन मांय देशभर रा डोढ़ हजार ऊँ बत्ता पत्रकार अर संपादक भाग ले रह्या है। **शांति, एकता और विश्वास** मुद्दा माथे राख्यी ज्या ई सम्मेलन मांय राज्यपाल कह्यो के समाज मांय शांति, एका अर भरोसा ने बधावो देवण मांय

मीडिया रो घणो खास काम है। वे कह्यो के लोकतंत्र रो चौथो खम्भो मान्यो जावण वाळो मीडिया लोकतंत्र री जड़ां ने हमेशा जीवित राखण रो काम करे है।

000

प्रधानमंत्री नरेन्द्र मोदी री खुद रे पाण ऊबा व्हेवण री सोच रा तैत पाली मांय काल लघु उद्योग भारती री ओर ऊँ दो दिन रो मेळो लगायो जावेला। इण रो मकसद वटे रा सामान ने बधावो देता थकां महिलावां ने माली तौर ऊँ मजबूत बणावणो है। मेळा मांय माली तौर ऊँ खुद रे पाण ऊबी महिलावां कानी ऊँ अचार, पापड़, शहद, हाथ री कारीगरी ऊँ बण्या सामान, कपड़ा-लत्ता अर ऊँटनी रा दूध समेत न्यारी-न्यारी चीजां री दुकानां लगायी जावेला। ध्यानजोग है के रेल मंत्री अश्विनी वैष्णव दो दिन पैली आं महिलावां रो काम देख्यो हो और वां सागे बातचीत कीनी ही।

000

प्रधानमंत्री नरेन्द्र मोदी री जिन्दगी रा बारा मांय बणायी ज्यी फिल्म “चलो जीते हैं” लोगां ने प्रेरित कर रही है। उदयपुर रा एक दर्शक प्रेम सिंह फिल्म देख्यां पाछे बतायो के ई फिल्म ऊँ सगळां ने सीख लेवणी चाहिजे।

000

विश्व पर्यटन दिवस आज प्रदेश मांय ई उमाव सागे मणायी ज्यो। ई मौके सैर-सपाटा री ठौड़ां सैलाणियां सारू खास कार्यक्रम राख्यी ज्यो। भरतपुर रा केवलादेव राष्ट्रीय उद्यान अर सरकारी संग्रहालय मांय देशी-परदेसी सैलाणियां री शहनाई बजा र आव-भगत करी ज्यी। ई दौरान लोक कलाकार सोहवणा कार्यक्रम पेश कीना। अलवर रा सरकारी संग्रहालय मांय सैलाणियां रो रीत मुजब स्वागत करी ज्यो। सरिस्का हलका मांय ‘जीरो प्लास्टिक ड्राइव’ चलायी ज्यो। जैसलमेर मांय गडीसर चौराहा माथे कलाकार गा-बजा र सैलाणियां रो स्वागत कीनो। करौली री ऐतिहासिक ठौड़ा ई मोटी तादाद मांय सैलाणी पूग्या। अजमेर समेत न्यारा-न्यारा जिलां मांय ई सैर-सपाटा री ठौड़ां सांस्कृतिक कार्यक्रम राख्या जावण सागे साफ-सफाई रा अभियान चलायी ज्यो।

000

प्रदेश रा वन्य जीव अभ्यारण्य चौमासा रे दौरान बंद रेहवण पाछे एक अक्टूबर ऊँ सैलाणियां सारू ओजू खुल जावेला। सरिस्का, केवलादेव अर रणथम्भौर राष्ट्रीय अभ्यारण्य मांय ई सारू खास तैयारियां करी जा रही है। म्हाणा सवाईमाधोपुर खबरनवीस बतायो के वटे रा लोगां अर सैलाणियां मांय नुवा पर्यटन सत्र सारू उमाव है।

000

राजस्थान हाईकोर्ट रा जज न्यायमूर्ति अशोक कुमार जैन री एकल पीठ सैकण्ड ग्रेड शिक्षक भर्ती परीक्षा-2022 रा पेपर लीक ऊँ जुड़्या प्रवर्तन निदेशालय (ईडी) रा मामला मांय आरोपितां री जमानत अर्जियां खारिज कर दीनी है। ई.डी. रा वकील अदालत मांय कह्यो के ओ मामलो पेपर लीक सरीखा गंभीर अपराध ऊँ जुड़्यो है, जिण मांय मोटी रकम रो लेन-देन करी ज्यो। वे आरोपितां माथे पेपर उम्मीदवारां ताई पूगावण रो आरोप माण्ड्यो। अदालत मामलां री गंभीरता ने ध्यान राखता थकां सगळां आरोपिता री जमानत अर्जियां नामंजूर कर दीनी।

000

बाँसवाड़ा जिला मांय ‘स्वस्थ नारी सशक्त परिवार अभियान’ रा तैत लगाया जा रह्या स्वास्थ्य शिविरां मांय महिलावां री खून री जांच करी जा रही है। ई सागे ई टी.बी. री बीमारी रा मरीजां ने पोषण किट दिया जा रह्या है। मुख्य चिकित्सा अर स्वास्थ्य अधिकारी डॉ. खुशपाल सिंह राठौड़ छोटी सरवन रा सामुदायिक स्वास्थ्य केन्द्र मांय लगायी ज्यो शिविर रो दौरा कर र व्यवस्थावां रो जायजो लीनो। भरतपुर जिला मांय ई ई अभियान रा तैत महिलावां री स्वास्थ्य संबंधी जांचां करायी जा रही है। मुख्य चिकित्सा अर स्वास्थ्य अधिकारी डॉ. गौरव कपूर बतायो के ओ अभियान आखा देश मांय 2 अक्टूबर ताई चलायो जावेला।

000

राज्य रा न्यारा—न्यारा ज़िलां मांय आज ग्रामीण सेवा शिविर लगायी ज्या। सवाईमाधोपुर रा ज़िला कलेक्टर काना राम ग्राम पंचायत लाखनपुर अर बपूई मांय लगायी ज्या शिविरां रो दौरा कर र जनता ऊँ बातचीत कीनी। वे सरकारी योजनावां रो फायदो लेवण वाळां ने सर्टिफिकेट अर मदद दीना। अतिरिक्त जिला कलेक्टर संजय शर्मा डिडायच अर चौथ का बरवाड़ा मांय लगायी ज्या शिविरां रो दौरा कीनो। भरतपुर री संभागीय आयुक्त डॉ. टीना सोनी करौली ज़िला री ग्राम पंचायत जटनगला मांय लगायी ज्या ग्रामीण सेवा शिविर रो दौरा कर र अहलकारां ने जनता ने बत्तो ऊँ बत्तो फायदो देवण रा हुकम दीना। भीलवाड़ा मांय सेवा पखवाड़ा रा तैत उद्योग अर खादी प्रदर्शनी लगायी ज्यी। पाली ज़िला रा गुंदोज मांय जागरूकता रैली निकाळी ज्यी।

000

केंद्र सरकार कानी जीएसटी री रेट मांय करी ज्यी कमी रा फायदा री जाणकारी जनता अर कारोबारियां ताई पूगावण सारू न्यारा—न्यारा ज़िलां मांय आज ई कार्यक्रम राख्यी ज्या।

सवाईमाधोपुर रा मानटाउन क्लब मांय जिला प्रशासन अर वाणिज्यिक कर विभाग री ओर ऊँ राख्यी ज्या कार्यक्रम मांय देवनारायण बोर्ड रा अध्यक्ष ओमप्रकाश भडाना कह्यो के जीएसटी सुधार रा ऐतिहासिक फैसला ऊँ आमजन ने पूरो फायदो मिलेला। जैसलमेर रा मोहनगढ़ मांय जीएसटी बचत उत्सव री जाणकारी देवण सारू पैदल यात्रा निकाळी ज्यी। ई मौके विधायक छोटू सिंह भाटी कह्यो के जीएसटी सुधारां रे मार्फत ग्राहकां ने सामान सस्तो मिलेला वे जनता ऊँ देशी सामान काम लेवण री अपील कीनी।

000

भरतपुर मांय आज ऐतिहासिक श्रीजसवंत प्रदर्शनी अर पशु मेळो सरू व्हयो। ज़िला कलेक्टर कमर चौधरी झंडो चढ़ा र इण री सरूआत कीनी। ई मौके वे केन्द्र अर राज्य री जनता रा भला री न्यारी—न्यारी योजनावां ऊँ जुड़ी प्रदर्शनी ई देखी। दस दिन चालण वाळा ई मेळा मांय राजस्थान सागे दूजा राज्यां रा कारोबारी ई शामिल व्हे रह्या है। मेळा मांय कुश्ती दंगल, ढोला गायन अर भजन जिकड़ी रा कार्यक्रम ई राख्या जावेला। नवमी अर दशमी रे दिन श्रीराम शोभायात्रा अर रावण दहन रा कार्यक्रम राख्या जावेला। ई रे अलावा सांस्कृतिक संध्या, तकनीकी सेमीनार अर कवि सम्मेलन ई व्हेला।

000

खाद्य सुरक्षा विभाग आज कोटपूतली—बहरोड़ ज़िला रा बानसूर हलका मांय मिलावटी दूध रो केन्द्र पकड़्यो। मुख्य चिकित्सा अर स्वास्थ्य अधिकारी डॉ. आशीष सिंह शेखावत बतायो के बलवा का बास गांव रा दूध कलेक्शन सेंटर माथे छापो मार र 40 लीटर मिलावटी दूध, 25 किलोग्राम मिल्क पाउडर अर 30 लीटर रिफाईंड पामोलिन तेल जब्त कर र मौके ई नष्ट करायी ज्यो।

000

मुख्यमंत्री भजनलाल शर्मा रो काल डीग ज़िला रा दौरा रो कार्यक्रम है। मुख्यमंत्री रा दौरा री तैयारियां रो जायजो लेवण सारू आज जिला कलेक्टर उत्सव कौशल अहलकारां सागे मीटिंग कीनी। वे सगळा महकमां ने तालमेल सागे काम कर र जरूरी व्यवस्थावां टेमसर तैय करण रा हुकम दीना।

000